



U akciji "Urban" na području Sarajeva privedeno sedam lica

BIVŠEG MINISTRA I EKIPU TERETE ZA MILIONSKU ŠTETU

Uz Oručevića uhapšeni i bivši dekan i prodekan sarajevskog Elektrotehničkog fakulteta Narcis Behlilović i Irfan Turković



Dragan SLADOJEVIĆ

SARAJEVO - Zbog sumnje da su budžet Kantona Sarajevo oštetili za više od tri miliona maraka, u Sarajevu je juče uhapšeno sedam lica, uključujući i bivšeg kantonalnog ministra Fahrudina Oručevića i dvoje sadašnjih radnika opštine Novo Sarajevo.

Epilog je to akcije "Urban", tokom koje je pretreseno sedam lokacija, a koja je usmjerena protiv organizovanog kriminala, te su je, pod nadzorom Kantonalnog tužilaštva Kantona Sarajevo, sproveli pripadnici Državne agen-

cije za istrage i zaštitu (SIPA), zajedno sa MUP-om

Kantona Sarajevo.

"Nezavisnim" je potvrđeno da su uhapšeni Fahrudin Oručević, bivši ministar obrazovanja, nauke i mladih Kantona Sarajevo i profesor sarajevskog Elektrotehničkog fakulteta, te bivši dekan i prodekan tog fakulteta Narcis Behlilović i Irfan Turković.

Uhapšeni su, kako saznajemo, i vještak Kenan Softić, zatim Nedžad Bubica, vlasnik firme "Lake", te Enes Begović, radnik opštine Novo Sarajevo, i Lamija Maglić-Stajić, službenica za inspeksijske poslove u toj opštini.

"Uhapšeni su osumnjičeni za organizovani kriminal u vezi sa

krivičnim djelima zloupotreba položaja ili ovlaštenja, sklapanje štetnog ugovora, zloupotreba procjene, poticaj na izvršenje krivičnog djela i poreska utaja", saopšteno je iz SIPA.

PRIVEDENI I OPŠTINARI ENES BEGOVIĆ I LAMIJA MAGLIĆ-STAJIĆ

Azra Bavčić, portparol Kantonalnog tužilaštva Sarajevo, potvrdila je "Nezavisnim" da osumnjičene terete da su kao članovi organizovane grupe od 2012. dod 2014. jednom pravnom licu pribavili protivpravnu imovinsku

korist zaključenjem štetnog ugovora u vezi sa gradnjom nekretnina, oštetivši budžet Kantona Sarajevo za više od tri miliona KM. Nezvanično saznajemo da se radi o firmi "Lake".

Po informacijama koje su juče objavili sarajevski portali, tamošnji Elektrotehnički fakultet vlasnik je atraktivne parcele koja se nalazi na Marijin Dvoru, a 2012. godine "pao" je dogovor između tadašnje uprave ETF-a i firme "Lake", koji je i osnov za jučerašnja hapšenja.

Objavljeno je da je tada dogovoreno da firma "Lake" renovira zgradu ETF-a koja se nalazi u kampusu i koja je master planom predviđena za rušenje, a zauzvat je trebalo da postanu vlasnici atraktivne parcele od pet dunuma.